

35-bob. Tashqi savdo operatsiyalari monitoring

243-modda. Tashqi savdo operatsiyalari ustidan monitoringni amalga oshirish

Tashqi savdo operatsiyalari monitoringi O‘zbekiston Respublikasi rezidentlari va norezidentlari o‘rtasida tuzilgan, tovarlarni bojxona chegarasi orqali olib o‘tish bilan bog‘liq bo‘lgan va qonun hujjatlariga muvofiq O‘zbekiston Respublikasi milliy valyutasida yoki chet el valyutasida o‘zaro hisob-kitoblar qilishni nazarda tutuvchi kontraktlarning (shartnomalarning, kelishuvlarning) bajarilishini kuzatib borish va tahlil qilish yo‘li bilan amalga oshiriladi.

Kontraktlarning (shartnomalarning, kelishuvlarning) bajarilishini monitoring qilish jarayonida Tashqi savdo operatsiyalarining yagona elektron axborot tizimida mavjud bo‘lgan axborot bojxona yuk deklaratsiyasi bilan solishtiriladi, tovarlarning amaldagi miqdori va sifati bo‘yicha tavsiflarining hamda assortimentining Tashqi savdo operatsiyalarining yagona elektron axborot tizimida ko‘rsatilgan ma’lumotlarga muvofiqligi nazorat qilinadi, shuningdek kontraktlarning qonun hujjatlari talablariga muvofiqligi tekshiriladi hamda mazkur kontraktlar (shartnomalar, kelishuvlar) yuzasidan muddati o‘tkazib yuborilgan debitorlik qarzar bor-yo‘qligi aniqlanadi.

244-modda. Tashqi savdo operatsiyalari monitoringini amalga oshirishda bojxona organlarining boshqa vakolatli organlar bilan o‘zaro hamkorligi

O‘zbekiston Respublikasi Davlat bojxona qo‘mitasi valyuta nazoratini amalga oshiruvchi organlardan biri bo‘lib, tashqi savdo operatsiyalari sohasida boshqa vakolatli organlar, shuningdek banklar va o‘zga tashkilotlar bilan axborot almashish, shu jumladan Tashqi savdo operatsiyalarining yagona

elektron axborot tizimi orqali axborot almashish yo'li bilan o'zaro hamkorlik qiladi.

245-modda. Valyutaga oid qonun hujjatlari buzilishlarining belgilari bojxona organlari tomonidan aniqlangan taqdirda ko'riladigan choralar

Valyutaga oid qonun hujjatlari buzilishlarining belgilari aniqlangan taqdirda bojxona organlari O'zbekiston Respublikasi Davlat soliq qo'mitasini quyidagi faktlardan xabardor qiladi:

olib kirilayotgan (olib chiqilayotgan) tovarlarning bojxona rasmiylashtiruvda bojxona organiga tovarning faktura qiymatini eksport qiluvchi (import qiluvchi) mamlakatda tovarning ma'lum qilingan qiymatiga nisbatan asossiz ravishda oshirish (kamaytirish) maqsadida noto'g'ri ma'lumotlar ko'rsatilgan hujjatlar taqdim etilganligi;

tovarlarning kontraktlar (shartnomalar, kelishuvlar) bo'yicha kontragent bo'lmagan yetkazib beruvchilardan kelib tushganligi;

(245-moddaning birinchi qismi to'rtinchi xatboshisi O'zbekiston Respublikasining 2018-yil 26-iyuldagi O'RQ-488-sonli Qonuniga asosan chiqarilgan — Qonun hujjatlari ma'lumotlari milliy bazasi, 27.07.2018-y., 03/18/488/1579-son)

eksport-import operatsiyalari amalga oshirilayotganda qonun hujjatlarini boshqa tarzda buzish hollari.

Taqdim etilgan faktlar soliq organlari tomonidan tasdiqlangan, shuningdek valyutani nazorat qilish sohasida huquqbuzarlik sodir etilganlik faktlari boshqa vakolatli organlar tomonidan taqdim etilgan taqdirda bojxona organlari:

O‘zbekiston Respublikasidan eksport qilinayotgan tovarlarning bojxona rasmiylashtiruvini kontraktlar bo‘yicha muddati o‘tgan debitorlik qarzi uzilguniga qadar rad etishga bundan qonun hujjatlarida nazarda tutilgan hollar mustasno;

(245-moddaning ikkinchi qismi ikkinchi xatboshisi O‘zbekiston Respublikasining 2018-yil 26-iyuldagi O‘RQ-488-sonli [Qonuni](#) tahririda — Qonun hujjatlari ma’lumotlari milliy bazasi, 27.07.2018-y., 03/18/488/1579-son)

qo‘shimcha bojxona to‘lovlarini hisoblab chiqarishga va undirishga;

valyuta tushumlari bilan bog‘liq materiallarni O‘zbekiston Respublikasining vakolatli organlariga berishga;

“Davlat bojxona xizmati to‘g‘risida”gi O‘zbekiston Respublikasi [Qonunida](#) belgilangan huquqlar doirasida boshqa harakatlarni amalga oshirishga haqli.